

大佛頂如來密因脩證了義諸菩薩萬行首

楞嚴經會解卷第九

綿九

天竺沙門般刺密帝譯

烏菴國沙門彌伽釋迦譯語

菩薩戒弟子前正議大夫同中書門下平

緯九

章事房融筆受

師子林沙門 惟則 會解

阿難白佛言世尊如來雖說第二義門今觀
世間解結之人若不知其所結之元我信是
人終不能解世尊我及會中有學聲聞亦復

如是從無始際與諸無明俱生雖得如
是多聞善根名為出家猶隔日瘡惟願大慈
哀愍淪溺今日身心云何是結從何名解亦
令未來苦難衆生得免輪迴不落三有作是
語已普及大衆五體投地兩淚翹誠佇佛如

采無上開示

溫陵曰前第二義文云不見所結云何知
解故此牒之而請也孤山曰同體無明品
數至多又迷境不一故曰諸生滅去來常
在妄中故曰俱補註曰世之瘡病隔日而

發為其病根未除故爾喻有學聲聞通惑

雖破而別惑病根未除也

爾時世尊憐愍阿難及諸會中諸有學者亦
為未來一切衆生為出世因作將來眼以闔
浮檀紫金光手摩阿難頂即時十方普佛世

界六種震動微塵如來住世界者各有寶光
從其頂出其光同時於彼世界來祇陀林灌
如來頂是諸大衆得未曾有於是阿難及諸
大衆俱聞十方微塵如來異口同音告阿難
言善哉阿難汝欲識知俱生無明使汝輪轉

生死結根惟汝六根更無他物汝復欲知無上菩提令汝速證安樂解脫寂靜妙常亦汝六根更無他物

溫陵曰先摩其頂者表無上開示也六震者動起踊吼震擊表破六根妄結也諸佛

總九

二

頂光灌釋迦頂者示同發明無上頂法異口同告者示諸佛脫生死證菩提皆由斯要也俱生即根本無明也生死妙常同因六根者知見立知故輪生死知見無見即證妙常如下所明

阿難雖聞如是法音心猶未明稽首白佛云何令我生死輪迴安樂妙常同是六根更非他物佛告阿難根塵同源縛脫無二識性虛妄猶如空華

吳興曰根塵識三攝十八界本如來藏妙

真如性故曰同源凡夫迷真故縛聖人悟真故脫迷悟雖殊始終理一故曰無二同源必蕪識性虛妄必具根塵文綺互也阿難由塵發知因根有相相見無性同於交蘆

吳興曰塵相通指六境知見略示二根境界對論攝十二處斯皆兩法相涉內無實性故喻若交蘆有以根境識三釋此喻者非也而不知經語巧妙從寬至狹上攝界義故三此攝處義故二下文又略其境單

總九

三

言其根故言知見立知等

是故汝今知見立知即無明本知見無見斯即涅槃無漏真淨云何是中更容他物

孤山曰上言立知而略見下言無見而略知經文互影也執知見實有名立知見此

即妄心是生死輪迴之本故云即無明本
達知見無性名無知見此即真心安樂妙
常故云斯即涅槃無漏真淨是則惟一真
心更無別法故曰云何是中更容他物又
解知見立知是迷真知見立緣塵等妄知

見故即無明知見無見是達真知見無緣
塵等妄知見故即涅槃故前文云入佛知
見也佛知見外更無別法故不容他物前
釋約常心即寂一切皆泯後釋約常心即
照有真知見故茲兩釋並符佛旨補註曰

云何是中更容他物者由上諸佛告阿難
言輪生死證妙常惟汝六根更非他物阿
難於此有疑舉以問佛佛乃兼引根塵識
三映帶辨釋而復結以知見立知等語知
見二字通攝六根言爲無明爲涅槃無非

六根而已豈更容他物哉此蓋釋阿難之
疑而證諸佛之言也又阿難前云若不知
其所結之元我信是人終不能解又云今
日身心云何是結從何名解故如來答以
知見立知即是結也即是所結之元也知

見無見即名解也

爾時世尊欲重宣此義而說偈言

真性有爲空 緣生故如幻 無爲無起滅
不實如空華

吳興曰真性即根塵之源也有爲即縛脫

綿九

四

之相也若真性在迷能生九界根塵之相
名之爲縛若真性出纏能起十界根塵之
用號之爲脫此縛與脫皆即真而俗故曰
有爲亦即俗而真故曰空也緣生故如幻
釋成有空義也有爲之法皆從緣生凡夫

以惑業為緣聖人以機感為緣二緣所生俱是假名故云如幻此頌根塵同緣縛脫無二也無為下頌識性虛妄猶如空華上言如幻助成空義耳今云空華正顯虛妄也且識性是有為起滅之法真性反此故

曰無為無起滅既云虛妄即是不實故喻如空華舊以前二句破有為後二句破無為出掌珍論

言妄顯諸真 妄真同二妄 猶非真非真云何見所見 中間無實性 是故若交蘆

吳興曰前長行但破於妄今復恐捨妄取真故重遣之孤山曰諸之也語助耳言根塵虛妄則顯涅槃真實對妄說真待對不絕真亦成妄故云二妄龍樹云若法為待成是法還成待猶非能遣也真非真所遣

維九

五

也非真即妄見即是根所見即境對妄說真猶皆遣蕩云何更有妄中根境乎中間謂根境二法體中無性此頌相見無性同於交蘆

結解同所因 聖凡無二路 汝觀交中性

空有二俱非 迷晦即無明 發明便解脫

吳興曰欲明解結泛舉所因所因者六根也前諸佛同告云汝欲識知生死結根乃至速證安樂解脫惟汝六根更非他物正同此義孤山曰汝觀下重牒前喻令審觀

也言空則蘆有外相言有則蘆中本空以喻根境妄執似有其體元空迷晦下頌知見立知及知見無見等

解結因次第 六解一亦亡 根選擇圓通入流成正覺

溫陵曰躡前結解之義起後圓通之文也
六解則根拔一亡則湛圓選得圓根則入
聖流證聖果矣

陀那微細識 習氣成暴流 真非真恐迷
我常不開演

溫陵曰陀那下頌根結初起之由也陀那
此翻執持執持種子發起現行即第八梨
耶含藏種子為習氣積生識浪為暴流湛
由是分結由是起也此識依真如合生滅
雜乎真妄之間故曰真非真也若以為真

恐迷妄習而自誤以為非真恐迷自性而
外求故權小教中皆不開演也深密經曰
阿陀那識甚微細一切種子成暴流我於
凡愚不開演恐彼分別執為我外道所執
神我即此識也

總九

六

自心取自心 非幻成幻法 不取無非幻

非幻尚不生 幻法云何立

溫陵曰頌解結入圓之要也一切諸法惟
心所現而於中取著妄成根結是自心取
自心非幻成幻法也由妄取故有幻非幻

若不妄取非幻亦無非幻尚無幻法何有

幻法不立則根塵頓淨圓通現前矣

是名妙蓮華 金剛王寶覺 如幻三摩提

彈指超無學 此阿毗達磨 十方薄伽梵

一路涅槃門

溫陵曰此結頌也此之法門於淨不著於
染不汙名妙蓮華根境結惑擬之則銷名
金剛王覺即為無為亡情絕解名如幻正
受依此脩進一彈指間可超無學而入圓
位也阿毗達磨云無比法十方如來迥出

生死速證亦常莫不由斯故曰十方薄伽梵一路涅槃門薄伽尊號具六義謂自在藏盛端嚴名稱吉祥尊貴孤山曰彈指超無學顯三止之功也若入地住則超小乘阿羅漢位縱入相似亦超無學以同除四

縛九

七

住此處為齊若伏無明三藏則劣又縱在觀行亦超無學如太子處胎貴壓群臣頻伽在鷲聲逾眾鳥

於是阿難及諸大眾聞佛如來無上慈誨祇夜伽陀雜糅精瑩妙理清徹心目開明歎未曾有阿難合掌頂禮白佛我今聞佛無遮大悲性淨妙常真實法向心猶未達六解一亡舒結倫次惟垂大悲再愍斯會及與將來施以法音洗滌沉垢

吳興曰祇夜云應頌又云重頌即頌上長

行也伽陀云諷頌亦畧云偈不因長行但諷美而頌之二頌合明故云雜糅精瑩此指能詮也妙理清徹此謂所詮也溫陵曰無遮大悲言其博濟也性淨妙常真實法句則真妄兩忘稱性之談也沉垢微細結

惑也長水曰由前偈云解結因次第六解一亦亡故此疑之

即時如來於師子座整涅槃僧絞僧伽梨攬七寶几引手於凡取劫波羅天所奉華巾於大眾前縮成一結示阿難言此名何等阿難

大眾俱白佛言此名為結於是如來縮疊華巾又成一結重問阿難此名何等阿難大眾又白佛言此亦名結如是倫次縮疊華巾總成六結一一結成皆取手中所成之結持問阿難此名何等阿難大眾亦復如是次第酬

佛此名為結

溫陵曰涅槃僧裏衣也僧伽梨大衣也劫波羅云時分即夜摩天也補註曰由阿難未達六解一亡舒結倫次故如來示一中成六結令悟六解則一亡示縮結之有次

編九

第令悟舒結之有倫次也

佛告阿難我初縮巾汝名為結此疊華中先實一條第二第三云何汝曹復名為結阿難白佛言世尊此寶疊華緝績成巾雖本一體如我思惟如來一縮得一結名若百縮成終

名百結何況此巾祇有六結終不至七亦不停五云何如來只許初時第二第三不名為結佛告阿難此寶華巾汝知此巾元止一條我六縮時名有六結汝審觀察中體是同因結有異於意云何初縮結成名為第一如是

乃至第六結生吾今欲將第六結名成第一不不也世尊六結若存斯第六名終非第一縱我歷生盡其明辨如何令是六結亂名佛言如是六結不同循顧本因一巾所造令其雜亂終不得成則汝六根亦復如是畢竟同

中生畢境異

吳興曰同謂一真之性理本無差譬巾之體也異謂六根之精事用有別如巾之結也補註曰此謂六結若存則倫次不容雜亂下言六結若解則一六俱亡

編九

九

佛告阿難汝必嫌此六結不成願樂一成復云何得阿難言此結若存是非鋒起於中自生此結非彼彼結非此如來今日若總解除結若不生則無彼此尚不名一六云何成佛言六解一亡亦復如是

温陵曰不成謂是非鋒起不成一體也願樂一成莫非解除結惑不生則同異圓泯故曰尚不名一六云何成吳興曰六根之精元是一真之性以隨緣故在眼曰見精在耳曰聽精等此皆如第二月捏所成故

若能隨根脫粘內伏六既融一一亦斯亡如解結已中亦無用

由汝無始心性狂亂知見妄發發妄不息勞見發塵如勞目睛則有狂華於湛精明無因亂起一切世間山河大地生死涅槃皆即狂

勞顛倒華相

吳興曰知見發妄此屬能見之相勞見發塵即對所見之境惟妄與勞五住備矣如勞目睛下雙喻其義一切世間下示塵勞之相

阿難言此勞同結云何解除如來以手將所結中偏掣其左問阿難言如是解不不也世尊旋復以手偏牽右邊又問阿難如是解不不也世尊佛告阿難吾今以手左右各牽竟不能解汝設方便云何解成阿難白佛言世

尊當於結心解即分散佛告阿難如是如是若欲除結當於結心

吳興曰左右牽掣俱不能解喻觀二邊皆不能破根本無明凡夫外道以斷常為二邊二乘菩薩以空有為二邊雖曰伏斷猶

佛九

十

存中結若欲除結當於結心者知見立知即名為結觀知中道是謂結心結不離中解之則一知不異道亡之則中補註曰上心性狂亂等示其根結之由展轉虛妄此掣中等示其解結之方也

阿難我說佛法從因緣生非取世間和合麤相

吳興曰既令解結當於結心欲使選根而修圓行故示佛法從因緣生及顯若無因緣佛法無由而生也如前文云譬如琴瑟

雖有妙音若無妙指終不能發是則圓修定慧是今因緣若三藏中事六度等皆是世間和合麤相

如來發明世出世法知其本因隨所緣出如是乃至恒沙界外一滴之雨亦知頭數現前種種松直棘曲鵠白烏玄皆了元由是故阿難隨汝心中選擇六根根結若除塵相自滅諸妄銷亡不真何待

孤山曰世謂六凡出世謂四聖知此十界皆因於心隨無明之染緣則出九界隨教

緣元

土

行之淨緣則出佛界故法華云佛種從緣起涅槃云亦有因緣因滅無明則得熾然三菩提燈吳興曰佛有權實二智實智冥理權智鑑物發明世出世法乃至知其種種元由者皆權智所鑑也既於情無情照了不昧顯今所說解結之法及選根之義悉是鑑物宜然固無差謬矣長水曰選擇六根者前文云若能於此悟圓通根與不圓根日劫相倍故令選擇

阿難吾今問汝此劫波羅巾六結現前同時解縈得同除不不也世尊是結本以次第縮生今日當須次第而解六結同體結不同時則結解時云何同除

吳興曰縮巾成結雖有次第粘湛成根必無倫緒故不可以喻而難於法也蓋言見

聞覺知六用差別如次第縮生也選擇六根隨於一根發觀如次第而解也慈師云意明六根不可齊觀但依一根入證自然銷六斯會經意焉

佛言六根解除亦復如是此根初解先得人空空性圓明成法解脫解脫法已俱空不生是名菩薩從三摩地得無生忍

吳興曰小乘折觀乃是作意先破人執次破法執然後會入空平等理大乘體觀人法無殊空非前後今言此根初解先得人

空者亦猶前文如澄濁水沙土自沉蓋任運而然也沈師以天台別教釋之孤山斥云其失非小應知人空是破五陰假名即見惑也法空是破五陰實法即思惑也乃至破涅槃淨法即無明也俱空不生即平

總

上

等空所空既盡能空亦滅如前火木然諸薪已亦復自然如是三空皆以中道而為觀體苟非此者何異解中左右牽掣乎阿難及諸大衆蒙佛開示慧覺圓通得無疑惑一時合掌頂禮雙足而白佛言我等今日

身心皎然快得無礙雖復悟知一六亡義然猶未達圓通本根世尊我輩飄零積劫孤露何心何慮預佛天倫如失乳兒忽遇慈母若復因此際會道成所得密言還同本悟則與未聞無有差別惟垂大悲惠我祕嚴成就如來最後開示作是語已五體投地退藏密機冀佛冥授

溫陵曰慧覺圓通存乎一心已蒙開示故身心皎然圓通本根冥乎萬法猶未通達故冀佛冥授也密言即發明慧覺之言也

祕嚴即圓通本根祕要也慧覺圓通我固
有之故雖因密言還同本悟若不開祕嚴
則與未聞無異故別求開示也二十五聖
於根塵七大各悟圓通是知本根冥乎萬
法也佛不顯說而因眾敷陳是謂冥授也

續光

主

退藏密機即息慮疑心也

爾時世尊普告眾中諸大菩薩及諸無漏大
阿羅漢汝等菩薩及阿羅漢生我法中得成
無學吾今問汝最初發心悟十八界誰爲圓
通從何方便入三摩地

孤山曰此下二十五聖觀十八界及以七
大乃是開合之殊耳識大則合於六識根
大則合於六根餘之五大則總收六境以
六境之體不出地水火風及空故也但言
十八則已攝七故前文云十方如來於十

八界一一脩行皆得圓滿無上菩提又此
十八只是六根以各開根境識三故是則
言六其義亦周故前文云令汝生死輪轉
安樂妙常同是六根更非他物

憍陳那五比丘即從座起頂禮佛足而白佛
言我在鹿苑及於雞園觀見如來最初成道
於佛音聲悟明四諦佛問比丘我初稱解如
來印我名阿若多妙音密圓我於音聲得阿
羅漢佛問圓通如我所證音聲爲上

孤山曰妙音密圓者密悟圓理也或曰涅

槃說身因而皆小聖淨名入不二則俱大
士惟茲二十五聖大小相參而云方便多
門歸元不二且陳那身子近悟偏空普賢
彌勒久證圓理久近兩異偏圓二殊安得
圓通其歸一揆對曰涅槃叙昔則小無大

分淨名方等則大隔小乘其談所證豈得相混至若今經二乘作佛與法華同塗開提有性將涅槃共轍教已開顯偏即圓融故使鹿苑之所證同成一乘之頓理均乎普賢諒無慙德此約實行聲聞也若乃內

緯九

十四

祕大道外現小乘則鹿苑以來何嘗非大既經發迹一揆何疑此約權行聲聞也悟理既同誰拘遠近以此觀之則大小相參之說怡然理順遠近偏圓之惑渙然冰釋吳興曰夫開權顯實之說惟諸佛祕要之

事非諸菩薩羅漢所能顯示其猶禮樂征伐自天子出非諸侯之事今佛所問最初發心悟十八界誰為圓通者且欲諸聖各述本根權實之道耳在昔方便未會真實諸聲聞人言與菩薩同入法性孰不自謂

悟入圓通如陳那等雖曰妙音密圓但是聞生滅四諦微密圓悟未可混同如來藏理故中阿含云我至波羅柰擊妙甘露鼓又云如來說法初中後妙豈彼妙名便同法華之妙乎只如下文說緣覺聲聞云勝

妙現圓及勝性現圓又說大梵善見身心妙圓及妙見圓澄豈此妙圓亦同圓覺妙明之性乎應知如來先令諸聖次第說竟後告文殊言此二十五無學諸大菩薩及阿羅漢各說最初成道方便皆言脩習真

緯九

三五

實圓通彼等脩行實無優劣前後差別斯則開權會實之正文也文殊偈云聖性無不通順逆皆方便蓋演如來之旨也主伴相濟雅合其宜又若陳那等本大迹小鹿苑所證不亦小乎豈顯本後翻今漸初密

悟圓理天台化儀四教龍樹二種法輪顯
露秘密俱無此說吾宗義學請熟思之

優波尼沙陀即從座起頂禮佛足而白佛言
我亦觀佛最初成道觀不淨相生大厭離悟
諸色性以從不淨白骨微塵歸於虛空空色

二無成無學道如來印我名尼沙陀塵色既
盡妙色密圓我從色相得阿羅漢佛問圓通
如我所證色因為上

溫陵曰優波尼沙陀此翻近少亦云塵性
謂微塵是色之少分也因塵悟解故得此

名昔多貪欲佛令作不淨觀長水曰因觀
色塵本如來藏故曰悟諸色性具與曰不
然既云觀佛最初成道正是小乘無漏行
法言悟諸色性者斯乃聲聞悟性念處也
南嶽師云觀五陰理性名性念處故雜心

論偈云是身不淨相真實性常定諸受及
心法亦復如是說以從不淨白骨微塵歸
於虛空者由多貪欲脩對治法成就九想
發真破惑即壞法羅漢也九想成時得慧
解脫於諸色相發明無漏故云妙色密圓

香嚴童子即從座起頂禮佛足而白佛言我
聞如來教我諦觀諸有為相我時辭佛宴晦
清齋見諸比丘燒沉水香香氣竦然來入鼻
中我觀此氣非木非空非烟非火去無所著
來無所從由是意銷發明無漏如來印我得

編九

六

香嚴號塵氣條滅妙香密圓我從香嚴得阿
羅漢佛問圓通如我所證香嚴為上

樵李曰宴安息也晦冥寂也清靜之室謂
之清齋資中曰非木等者觀性空也具興
曰凡言性空必推四性今當以木為自烟

火爲他和合爲共空爲無因此似行門觀
幻有即空之相下諸聲聞亦多是小乘觀
實有滅空之義小衍雖殊所證圓通同一
真諦耳若諸菩薩所悟須約中道第一義
諦言之應有歷別圓融之異經雖隱畧理

合該通如淨名室內三十二大士說入不
二之法門天台所解亦分圓別豈以不二
混同諸入乎先云香嚴童子則從菩薩受
稱復云得阿羅漢蓋叙昔日所證如下文
月光童子初得小果後於佛所得童真名

預菩薩會以彼驗此名實可知

藥王藥上二法王子并在會中五百梵天即
從座起頂禮佛足而白佛言我無始劫爲世
良醫口中嘗此娑婆世界草木金石名數凡
有十萬八千如是悉知苦酢鹹淡甘辛等味

緣六

七

并諸和合俱生變異是冷是熱有毒無毒悉
能徧知承事如來了知味性非空非有非即
身心非離身心分別味因從是開悟蒙佛如
來印我昆季藥王藥上二菩薩名今於會中
爲法王子因味覺明位登菩薩佛問圓通如
我所證味因爲上

孤山曰苦酢等六味也衆味共成名和合
味直爾采用名俱生味脩鍊炮炙名變異
味具興曰由事佛故必聞正法即於味性
了生無生空有謂味塵也身心謂舌識也
以味從合中知故相對言之味非空故非
離身心味非有故非即身心中道之性於
是乎顯

跋陀婆羅并其同伴十六開士即從座起頂
禮佛足而白佛言我等先於威音王佛聞法

出家於浴僧時隨例入室忽悟水因既不洗
塵亦不洗體中間安然得無所有宿習無忘
乃至今時從佛出家令得無學彼佛名我跋
陀婆羅妙觸宣明成佛子住佛問圓通如我
所證觸因為上

孤山曰跋陀婆羅此云賢守亦云賢護自
守護賢德亦守護衆生資中曰準法華經
有二萬億威音王佛前後出世最初佛像
法中此跋陀等為增上慢毀常不輕故千
劫墮阿鼻獄罪畢值後佛出家吳興曰水
因謂所觸之因也塵體即能觸之緣也塵
既無染體亦常淨能所如幻二邊俱空故
中間覺觸之心安然契性矣泐潭曰觸具
三和今翻為三德祕藏故名妙觸宣明也

補九

大

大佛頂如來密因脩證了義諸菩薩萬行首
楞嚴經會解卷第九

音釋

瘡 魚約切 病也
翹 渠遙切 危也
擊 昌列切 攪也
鷓 苦角切 鳥欲出也
糝 女救切 雜水
揆 渠茶切 度也
也 烏板切 繫也
名 渠茶切 度也